



Prijedlog programa rada Samostalnog sindikata radnika u BHRT-u za 2018. godinu

1. Stabilno finansiranje BHRT-a
2. Zaštita radno-pravnog statusa uposlenika
3. Poboljšanje materijalnog statusa uposlenika
4. Obrazovanje radnika
5. Aktivnosti na povećanju članstva
6. Pomoć članovima i ispraćaj penzionera
7. Saradnja sa sindikatima i udruženjima

1. Stabilno finansiranje BHRT-a

Obzirom na veoma težak položaj BHRT-a, zbog nerješavanja problema stabilnog finansiranja, SSR u BHRT-u će preduzeti sve zakonom dozvoljene akcije kako ne bi došlo do gašenja BHRT-a i gubitka radnih mjesta naših članova. U realizaciji toga, potrebna je koordinirana akcija svih struktura Sindikata, podrška svih naših članova, kao i ostalih radnika BHRT-a, koji nisu naši članovi, jer smatramo da je to zajednički problem svih radnika BHRT-a.

2. Zaštita radno-pravnog statusa uposlenika (kolektivni ugovor)

Tražiti od menadžmenta potpisivanje protokola o saradnji u kojem bi bilo jasno definisano na koji način će se voditi pregovori o izradi novih akata BHRT-a.

U tom aktu bi, između ostalog, trebalo definisati o kojim aktima će se pregovarati, kao i vremenski slijed pregovaranja svakog akta sa utvrđenim rokovima. Obzirom na nepostojanje određenog broja akata, zastarjelost većine akata, kao i njihovo neprovođenje, potrebno je urediti čitav set akata kako bi BHRT imao efikasno upravljanje, a radnici bili plaćeni prema radu. Osnovni zadatak UO Sindikata će biti izrada prijedloga kolektivnog ugovora kojim bi bili definisani:

1. Osnovica plate (minimalna plata),
Osnovica plate u BHRT-u treba da bude jednaka minimalnoj plati dogovorenoj u jednom od entiteta i to iz onog entiteta u kojem je definisana u većem iznosu.
2. Omjer između najveće i najmanje plate u BHRT-u u maksimalnom rasponu od 1:5
3. Uslovi za rad Sindikata

Dok se ne izmjene akti BHRT-a, uvažavajući situaciju u kojoj se trenutno nalazi BHRT, UO će tražiti zaštitu radno-pravnog statusa uposlenika kroz postojeće akte BHRT-a.

Obzirom da su moguće izmjene Zakona o radu u institucijama BiH, a unutar toga i odrednice o minimalnoj plati, UO će uskladiti zahtjeve sa Zakonom.

3. Poboljšanje materijalnog statusa uposlenika

Nastavićemo sa aktivnostima u iznalaženju poslovnih subjekata s kojima ćemo, kroz potpisivanje ugovora o saradnji, pokušati obezbijediti razne popuste i povoljnosti u nabavci roba ili korištenju usluga te i na taj način, bar donekle poboljšati materijalni status naših

članova. U ovim aktivnostima bi učešće morali uzeti svi članovi UO, kao i članovi Sindikata ukoliko to žele.

4. Obrazovanje radnika

U razgovorima sa menadžmentom tražiti da menadžment obezbijedi obrazovanje radnika u skladu sa Zakonom. Kako po pitanju uvođenja novih tehnologija, tako i po pitanju obrazovanja postojećeg kadra, kako ne bi morali vršiti dodatno zapošljavanje. Puno bi bilo bolje kada bi menadžment obezbijedio određene programe školovanja (ne nužno i plaćao) za trenutno zaposlene, nego upošljavanje novih radnika i otpuštanje onih koji već imaju iskustvo u radu na BHRT-u. Takvi programi bi se mogli uraditi u dogovoru sa obrazovnim institucijama, obzirom da na nekim od njih i naši uposlenici rade kao profesori.

5. Aktivnosti na povećanju članstva

Naš stalni cilj treba biti povećanje broja članova. Kroz djelovanje povjereništava u podružnicama treba poboljšati komunikaciju sa članovima, ali i sa onim radnicima koji su zainteresirani za rad ovog Sindikata, te stalno potencirati akcije i planove Sindikata i ukazivati na povoljnosti koje imaju članovi Sindikata.

U svemu tome je jako bitan faktor što je SSR u BHRT-u, dobio reprezentativnost odlukom Vijeća ministara od 01.08. 2016. godine, kao i pravo na štrajk koje je stekao Odlukom o minimumu procesa rada u BHRT-u koju je Vijeće ministara donijelo 04.12. 2017. i potpisivanjem Sporazuma o minimumu procesa rada sa menadžmentom BHRT-a.

Upravni odbor ima i zadatak da nastavi raditi transparentno i da je uvijek otvoren za sve inicijative koje dolaze iz podružnica.

6. Pomoć članovima i ispraćaj penzionera

Samostalni sindikat radnika u BHRT-u će i dalje nastaviti da pomaže članovima kojima bude potrebna pomoć zbog zdravstvenih problema.

Također, planiramo nastaviti sa akcijama prigodnog obilježavanja određenih datuma i događaja (praznici, ispraćaj članova koji odlaze u penziju i sl.)

7. Saradnja sa sindikatima i udruženjima

Sindikat će nastaviti sa razvijanjem postojeće saradnje sa sindikatima i medijskim udruženjima u BiH, kao i pokušati ostvariti saradnju sa svima onima koji budu iskreno podržavali naše ciljeve. Također pokušaće djelovati i u regionalnim okvirima, u skladu sa svojim mogućnostima.

Upravni odbor
Samostalnog sindikata radnika u BHRT-u